

ԱՐԵՎԻՏԱՀԱՅՆՐԻ 1829—1830 ԹԹ. ԳԱՂԹԸ  
ՀԱՅԿԱԿԱՆ ԽԱՐԶ ԵՎ ՀԱՐԱԿԻՑ ՇՐՋԱՆՆԵՐ

Մ. Ղ. ԳԱՐԻՆՅԱՆ

Ռուս-թուրքական 1828—1829 թթ. պատերազմը, ինչպես հայտնի է, վերջացավ Ադրիանապոլսի պայմանագրով, որ կնքվեց 1829 թ. սեպտեմբերի 2-ին: Պայմանագրի շորրորդ հոդվածով Ռուսաստանին անցան Սև ծովի արևելյան ափերը՝ Անապոլիսից մինչև Փոթի նավահանգիստը և Ախալցխայի փաշայության մի մասը՝ Ախալցխա ու Ախալքալաք ամրոցներով: Արևմտյան Հայաստանը վերստին մնաց սուլթանի իշխանության տակ: Վերագործվեցին էրզրում, Կարս, Բայազետ, Բաբերդ, Մուշ, Արղահան, Օլթի, Ալաշկերտ, Խնուս քաղաքները և հարյուրավոր հայաբնակ գյուղեր, որոնց գրավումը ռուսների կողմից մեծ ուրախություն էր պատճառել արևմտահայությանը:

Հաշտության պայմանագիրը ստորագրելուց հետո էրզրումի, Բայազետի և Կարսի փաշայություններում ապրող հայության վիճակը կրկնակի ծանրացավ: Պատերազմի ժամանակ հայերը ոգևորությամբ ընդունեցին ռուսներին և ամեն կերպ օգնեցին նրանց: 1829 թ. հունիսին, օրինակ, 2.000 հայեր միանալով ռուսական զորքերին հերոսաբար մարտնչեցին թուրքերի դեմ և հարյուրավոր զոհերի գնով պաշտպանեցին Բայազետը: Թուրքական հրամանատարությունը Բայազետում և Կարսում կրած իր պարտությունները արդարացնում էր հայերի դավաճանությամբ: Հայերը մեծապես աղոթել էին նաև էրզրումի սերասկյարի վրա՝ քաղաքն առանց կռվի հանձնելու գործում: Թուրքերի վրեժխնդրությունն ավելի զրգովեց, երբ քաղաքի հայության անունից Կարապետ արքեպիսկոպոսը և Գրիգոր Շաքարձյանը էրզրումի մատույցներում, հանդիսավոր կերպով, խաչով ու խաչվառով դիմավորեցին Պասկևիչին ու ռուսական զորքերին: Երբ վերջիններս մոտենում էին էրզրումին, այնտեղ հասավ նախաձեռնող կաթողիկոսի կոնդակը, որով հանձնարարվում էր Կարսի հայոց առաջնորդին հորդորել իր հովվապետության տակ գտնվող հայերին՝ օգնելու ռուսական զորքերին: Այդ կոնդակը ընկավ թուրք փաշաների ձեռքը: Էրզրումի հայերին սպասվում էր սարսափելի կոտորած, որը տեղի չունեցավ թուրք փաշաների ատյան կանչված Կարապետ արքեպիսկոպոսի ճարակության շնորհիվ. նա կաշառել էր թուրք թարգմանչին և աղավաղել կոնդակի բովանդակությունը:

Թեև Ադրիանապոլսի խաղաղության դաշնագիրը ինչպիսի տպավորություն թողեց արևմտահայության վրա և ինչ տրամադրություններ առաջ բերեց՝ բացահայտված է հենց իր՝ Պասկևիչի 1829 թ. հոկտեմբերի 10-ի նիկոլայ 1-ին հրած ղևկույցում. «Այն խաղաղությունը, որ Ձերդ Կայսերական Մեծությունը բարեհաճել էք շնորհել Բարձրագույն Դռանը, Ձեր օգոստոսափառ անվան օրհ-

1 Տե՛ս 2. Գ և ղ ա մ յ ա ն ց, Կարապետ արքեպիսկոպոս, «Փորձ», 1876, № 1, էջ 175:

նություն բերեց այնքան միլիոնավոր մարդկանց կողմից, բայց այստեղ, Ասիայում, ընդհանուր ուրախության մեջ, այդ հաշտության լուրը իրավացի տրտմության մեջ ձգեց ժողովրդի այն մասը, որը արժանի է մեր կարեկցությանը և մշտապես կրած իր տառապանքներով ու ուսական դենքի հաջողությանը ցույց տված իր փորձով, և այն դժբախտ ապագայով, որ սպասում է նրան, եթե Չերդ Կայսերական Մեծության հզոր աջի հովանու ներքո նա չի գտնելու ապահով ապաստան ընդդեմ այն հալածանքների, որ իրեն սպառնում են... Բայադետում 2 հազար հայեր մարտնչում էին մեր զինվորների շարքերում՝ էրզրումում քրիստոնյա բնակչության մեծ մասն իր քահանայապետի գլխավորությամբ մեր զորքերին ընդառաջ դուրս եկավ. Կարսում հայերից կազմված մի գումարտակ և մինչև 800 հոգի հեծյալներ պահպանում էին սահմանները հարձակումներից: Այն ընտանիքների թիվը, որոնց անխուսափելի վտանգ է սպառնում, կարող է հասնել մինչև 10 հազարի: Բարեհաճեցեք, ո՞վ ամենաողորմած թագավոր, ձեր գթառատ ուշադրությունը դարձնել այս դժբախտ զոհերի վրա և մի թույլ տվեք, որ օսմանցիների ինքնիշխանությունը վրեժ լուծի նրանցից այն հավատարմության համար, որ նրանք ցույց տվեցին Ռուսաստանին»<sup>2</sup>:

Այնուհետև Պասկևիչը կայսրից խնդրում էր թույլ տալ այդ դժբախտ քրիստոնյաներին բնակեցնել Վրաստանում և Հայկական մարզում, անհրաժեշտության դեպքում նաև Հյուսիսային Կովկասում: Չնայած նրանց սկզբնական բրնակության համար մեծ ծախսեր են պահանջվում, գրում էր Պասկևիչը, բայց դրանք, անկասկած, հետագայում կհատուցվեն առատորեն այդ աշխատասեր և գործունյա ժողովրդի կողմից: Գաղթողներին օգնելու համար Պասկևիչը ցարից խնդրում էր թույլ տալ յուրաքանչյուր ընտանիքին բաց թողնել 25 ուրբլի նրպաստ այն 100 հազար ոսկուց, որը տրվել էր իրեն ծախսելու քրդերին ուսանների կողմը գրավելու նպատակով, բայց ծախսվել էր ընդամենը 10 հազար ոսկի<sup>3</sup>:

Ռազմական միևիստր Չերնիշևը 1829 թ. նոյեմբերի 18-ին պատասխանեց, որ «կայսրը բարեհաճել է հավանություն տալ 10 հազար հայ ընտանիքներին գաղթեցնելու և նրանց կարիքների համար ծախսել իր մոտ եղած 90 հազար ոսկին: Նիկոլայ I-ը միաժամանակ ցանկություն էր հայտնել գաղթականների մի մասին բնակեցնել Ախալցխայում և նրա շրջակայքում, «ուր նրանք օգտակար կլինեն մեր նոր սահմանների պաշտպանության համար»<sup>4</sup>:

Ադրիանապոլսի պայմանագրի 13-րդ հոդվածով Թուրքիայում ապրող քրիստոնյաներին թույլատրվում էր 18 ամսվա ընթացքում վաճառել իրենց անշարժ գույքերն ու կալվածքները և անարգել գաղթել ուսական սահմանները<sup>5</sup>:

1829 թ. դեկտեմբերի 3-ին Պասկևիչը հայտնում է Վրաստանի քաղաքացիական նահանգապետ Պ. Դ. Զավիլեյսկուն, թե հաշտության լուրը ստանալով, Թուրքիայում ապրող քրիստոնյաները ցանկանում են գաղթել Ռուսաստանի սահմանները և նրանցից շատերը, որպես առանձին օղորմածություն, խընդ-

<sup>2</sup> Центральный государственный военно-исторический архив, ф. ЕУА, л. 1019, р. 3.

<sup>3</sup> Նույն տեղում:

<sup>4</sup> Նույն տեղում, թթ. 4—5:

<sup>5</sup> Штук «Договоры России с Востоком, составил Т. Юзефович», СПб, 1869, т. 2 78—79:

րում են այդ իրավունքը «չպահանջելով ռուսական կառավարությունից ոչ մի օգնություն»<sup>6</sup>: Պասկևիչն, ընդառաջելով հայերի և հույների ցանկությանը, 1829 թ. հոկտեմբերին հրամանագրում է էրզրումի, Կարսի, Բայազետի ռուսական զորքերի հրամանատարներին՝ անցագիր տալ այն հայերին և հույներին, որոնք այժմ ցանկանում են գաղթել, առանց կառավարությունից որևէ օգնություն հայցելու<sup>7</sup>: Գաղթի գաղափարը այնքան խոր էր մտել հայերի մեջ, որ նրանց մի մասը, շսպասելով գարնան բացվելուն, զոհաբերելով անգամ շարժական գույքի մի մասը, ուղ աշնանը սկսեց շարժվել դեպի ռուսական սահմանները: Չնայած բազմաթիվ դժվարություններին, 1829 թ. վերջերին Գյումուշխանեից Մալկա գաղթեցին 85 ընտանիք հույներ, էրզրումի նահանգից Փամբակի գավառը՝ 59 ընտանիք հայ կաթողիկներ և Բայազետի գավառից Հայկական մարզ՝ 200 ընտանիք<sup>8</sup>:

Գաղթականների խոշոր զանգվածների տեղաշարժը պետք է սկսվեր 1830 թ. գարնանը: Այդ նպատակով 1829 թ. դեկտեմբերի 3-ին Պասկևիչը հրամանագրում է Վրաստանի քաղաքացիական նահանգապետ Զավիլեյսկուն, որպեսզի Թուրքիայից գաղթող բրիտանացիներին բնակեցնելու համար Թիֆլիսում հիմնվի Գաղթականական կոմիտե՝ իր նախագահությամբ (կազմվեց 1830 թ. հունվարի 28-ին)<sup>9</sup>, ուղարկում է նաև 13 կետից բաղկացած հրահանգ: Գաղթի կանոնները և գաղթականներին տրվող արտոնությունները իրենց բովանդակությամբ նույնն էին, ինչ որ 1828 թ. նախատեսվել էին պարսկահայերի համար: Ըստ նոր հրահանգի արևմտահայ արհեստավորները և առևտրականները պետք է բնակվեին քաղաքներում, իսկ գյուղացիները՝ գյուղերում: Ընդ որում վերջիններս համար պարտադիր էր ընտրել իրենց նախկին բնակավայրերի դիրքին և կլիմային համապատասխան վայրեր: Կոմիտեն պարտավոր էր գաղթականներին ապահովել հողերով՝ յուրաքանչյուր գյուղին իր ընտանիքների թվի համեմատ: Գաղթականները, որպես անշեղ կանոն, պետք է բնակեցվեին միայն պետական հողերում<sup>10</sup>: Նոր բնակավայրերում գաղթականները, 1819 թ. հոկտեմբերի 22-ի օրենքի համաձայն, 6 տարի ազատվում էին հարկերից և 3 տարի՝ պարհակներից, իսկ կարիքավորներին փոխարինաբար տրվելու էր դրամական օգնություն (ընտանիքին միջինը 25 ռուբլի)<sup>11</sup>՝ բնակվելուց շորս տարի անց, հետագա 6 տարվա ընթացքում վճարելու պայմանով<sup>11</sup>:

էրզրումի, Բայազետի և Կարսի հայ գաղթականների և Պասկևիչի միջև 1829 թ. վերջերին և 1830 թ. սկզբներին գործուն բանակցություններ են տեղի ունեցել հիշյալ գաղթականներին իրենց ցանկացած քաղաքներում և գավառներում բնակեցնելու համար: Այսպես, էրզրումի նահանգի և քաղաքի հայերի անունից Կարապետ արքեպիսկոպոսը և 29 պատվավոր քաղաքացիներ 1829 թ. դեկտեմբերի 15-ին իրենց ստորագրություններով ու կնիքներով, Սերովբե

<sup>6</sup> «Акты Кавказской археографической комиссии» (այսուհետև՝ АКАК), т. VII, № 820.

<sup>7</sup> Նույն տեղում, № 821:

<sup>8</sup> Центральный государственный исторический архив Груз. ССР (այսուհետև՝ ՎԿՊԱ), ф. 2, г. 1, к. 2594, թթ. 228—232:

<sup>9</sup> АКАК, т. VII, № 822.

<sup>10</sup> Նույն տեղում, № 820:

<sup>11</sup> Նույն տեղում:

վարդապետ Կարնեցու միջոցով, Պասկևիչին են ներկայացնում մի աղերսագիր, որով խնդրում են «բնակիլ յԱխալցխայ քաղաք և մերձակա գավառսն նորին»<sup>12</sup>: Բայց գետ քաղաքի և նրա գավառների հայերի անունից Մկրտիչ Արծրունին և 11 երևելիներ 1830 թ. փետրվարի 3-ին Թիֆլիսում Պասկևիչին էին ներկայացրել «Ամենախոնարհ խնդիր», որով խնդրում էին. «Շնորհել հասարակութեան մերոց ի բնակութիւն գԳեղարքունի, գԳյուղչայ և շրջակայս ծովափին Սևանայ»<sup>13</sup>: Կարս քաղաքի և գավառի հայերը ցանկություն էին հայտնել բնակվելու Գյումրի ամրոցում և Շորագյալի, Լոռի-Փամբակի գավառներում<sup>14</sup>: Գաղթի խնդրով գեներալ Պանկրատևին էր դիմել նաև էրզրում քաղաքի և նահանգի հայ կաթողիկոսների համայնքի առաջնորդ Եփրեմ վարդապետ Սեթյանը, որը ներկայացրել էր քաղաքի և 16 գյուղերի 560 բնտանիքի ցուցակը<sup>15</sup>:

Արևմտահայ գաղթականները բաժանվում էին երեք մեծ խմբի՝ Էրզրումցիներ, կարսեցիներ և բայազետցիներ: Էրզրումցիներին գաղթի ներշնչողն ու առաջնորդն էր Կարապետ արքեպիսկոպոսը, կարսեցիներին՝ Ստեփան Լպիսկոպոս Նաժակյանը, իսկ բայազետցիներին՝ պատվավոր քաղաքացի Մկրտիչ Արծրունին:

Մեծ էր արևմտահայերի՝ ռուսական մարզերը գաղթելու ցանկությունը, բայց միաժամանակ նրանց տարակուսանքի մեջ էր գցել իրենց անշարժ գույքն ու կալվածքները վաճառելու հարցը: Ցարական կառավարությունը համոզված լինելով, որ արևմտահայերի գաղթելու ցանկությունն անսասան է, ոչ մի ջանք չգործադրեց նրանց անշարժ գույքի և կալվածքների տնօրինման՝ վաճառելու կամ ինչ-որ շահով փոխհատուցում տալու ուղղությամբ: Այդ տեսակետից ուշագրավ է Հավիլեյսկու անմարդկային պատասխանը Կարսի հայերին. «Կարսի գաղթականները, — գրում էր նա, — ոչ մի իրավունք չունեն պահանջել ռուսական կառավարությունից հատուցել իրենց կալվածքների համար, քանի որ նրանք չեն գաղթում հրամանատարության զորամամբ, այլ իրենց սեփական ցանկությամբ, որպեսզի փրկվեն թուրքերի կողմից իրենց սպասվող հալածանքներից և պանաղան աղետներից: Բավական է և այն, որ Ռուսական տիրույթներում նրանց տալիս են պետական հողեր, աղքատներին՝ որոշ նըպաստ, և մի քանի տարով ազատում են տուրքերից ու պարհակներից: Կալվածքների վաճառքը կախված է գաղթականների սեփական ջանքից: Կառավարությունը միջոցներ չունի և պարտավոր չի հարկադրելու մնացող բնակիչներին դնել այդ կալվածքները»<sup>16</sup>:

Ձմռան երկարատև նախապատրաստություններից հետո 1830 թ. գարնանն սկսվեց արևմտահայերի զանգվածային գաղթը: Կարսեցիները, որոնք բնակվելու համար բնտրել էին Շորագյալի և Փամբակի գավառները, գարնանը առանց մեծ դժվարության, սեփական միջոցներով տեղափոխվեցին իրենց նոր բնակավայրերը և սկսեցին տներ կառուցել, ցանք կատարել: Գեներալ Պանկրատևը, հաշվի առնելով Կարսի մոտ լինելը և ռուսական մարզերում պարենի պակասությունը, Կարսի գավառի գաղթականների դաշտերի բերքը զնված

<sup>12</sup> Մատենադարան, Կաթողիկոսական դիվան, թղթ. 257, 3-րդ մաս, վավ. 41:

<sup>13</sup> ՎԿՊՊԱ, ֆ. 2, ց. 1, գ. 2594:

<sup>14</sup> Նույն տեղում, թթ. 228—232:

<sup>15</sup> Նույն տեղում, թթ. 6—7:

<sup>16</sup> Նույն տեղում, թ. 118:

Հայտարարեց ռուսական կառավարության կողմից և այնտեղ թողեց կապիտան Վոյնիկովին, Մարտիրոս Վեբիլյանին ու 20 կազակների՝ դաշտերը հսկելու և բերքը հավաքողներին օգնելու համար<sup>17</sup>։ Արագ և հաջող ընթացավ նաև բայադետցիների գաղթը։ Մի քանի օրում Բայադետ քաղաքը և պատմական Կոզովիտ գավառը դատարկվեցին իրենց վաղեմի բնակիչներից։ Բայադետը լրիվ դատարկվեց, այնտեղ մնաց ընդամենը 4 հայ ընտանիք։

Գաղթականների ամենամեծ խումբը էրզրումցիներն էին։ Սրանք էլ Կարապետ արքեպիսկոպոսի առաջնորդությամբ 1830 թ. մայիսի 10-ին թողեցին պատմական Բարձր Հայք նահանգը և բռնեցին անակնկալ դժվարություններով լի գաղթի երկար ու տխուր ճանապարհը։ Մայիսի 15-ից հունիսի 5-ը դատարկվեցին էրզրում, Բաբերդ, Գյումուշխանե, Քղի քաղաքները և Գերջան, Թորթում, Վերին, Ներքին Բասեն, Սպեր, Թիքման գավառները։ Քրդական և թուրքական հրոսակախմբերի հանկարծակի հարձակումները կանխելու նպատակով Պանկրատևը յուրաքանչյուր խմբին կցում էր հայերեն իմացող մեկ սպայի և մի քանի կազակից բաղկացած պահակախումբ։ Գաղթականների հետ միասին էրզրումից հեռացան նաև ռուսական զորքերը։

Պատերազմի նախօրյակին այս քաղաքն ուներ մոտ 100 հազար բնակիչ<sup>18</sup>։ Հայ հեղինակների՝ Ն. Սարգսյանի, Մ. Միրախորյանի և այլոց տվյալներով դրանցից հայեր էին 4000 ընտանիք կամ շուրջ 20 հազար հոգի, որոնցից տեղում մնացին 128 ընտանիք<sup>19</sup>։

Բավարար քանակով սայլեր չլինելու պատճառով էրզրում քաղաքից Կարս հասած հազարավոր գաղթականների համար ստեղծվել էր ծանր վիճակ։ Թուրք սալապանները էրզրում քաղաքի հայերի բռնները հասցնելով Կարս, ցրվեցին իրենց գյուղերը, և գաղթականներն ստիպված էին շաբաթներով, ամիսներով սնօթևան տառապել Արփաշայ ու Կարսաշայ գետերի հովիտներում, ձորերում։ Քանի որ հուլիսի 5-ին Կարսը պետք է հանձնեին թուրքերին, ռուսական հրամանատարությունը այնտեղ իջևանած էրզրումի գաղթականներին տեղափոխեց Ախուրյան գետի ձախ ափը՝ մինչև որ փոխադրամիջոցներ կհայթայթվեին։ Մանր էր մասնավորապես Ախուրյանի ափին մնացած 1800 ընտանիքների վիճակը։ Նոր վերակացու, մայր Անոսովը, շրջանցելով նախնական տեղաբաշխումը, առաջարկեց նրանց բնակվել այնտեղ, ուր ցանկանում են։ Մոտ 200 ընտանիք մեկնեց Մեծ Ղարաբիլիսա, մյուսներն էլ ցրվեցին Շորագյալի մոտակա գյուղերը՝ սպասելով դարնան դալուն<sup>20</sup>։ Կարս քաղաքի բնակիչները, ավելի քան 600 տուն, բաժանվեցին երեք մասի. առաջին երկուսը բնակվեցին Մեծ Ղարաբիլիսայում, Գյումրիում, իսկ երրորդը, հոգևոր առաջնորդ, արքեպիսկոպոս Ստեփան Խաժակյանի ղիսավորությամբ, հաստատվեց Ղիչաղ (այժմ՝ Արթիկի շրջանի Հառիճ) պատմական գյուղում<sup>21</sup>։

էրզրումի, Բայադետի, Կարսի, Բաբերդի, Արղահանի և հարյուրավոր հայաբնակ գյուղերի միանգամից դատարկվելը հայերից խիստ անհանդրատացրեց թուրքական կառավարությանը, որը չէր սպասում, որ հայերն

<sup>17</sup> Նույն տեղում, թիվ 216—217։

<sup>18</sup> Տե՛ս Հ. Ֆ. Պ. Լիսչ, Հայաստան, ուղևորություններ, հատ. Բ, Կ. Պոլիս, 1914, էջ 232։

<sup>19</sup> Տե՛ս Կ. Ա. Ղա ն յ ա ն ց, Կարևո գաղթը, Քիֆլիս, 1891, էջ 20։

<sup>20</sup> Նույն տեղում, էջ 27։

<sup>21</sup> Նույն տեղում, էջ 24—25։

այդպես արագ ու զանգվածաբար կլքեն իրենց հայրենիքը, հարազատների գերեզմանները, սրբավայրերը և կզաղթեն: Կարծում էին, թե նրանց բռնությամբ գաղթեցնում են ռուսական զորքերը և Կարապետ արքեպիսկոպոսը: Էրզրումի ռուսական զորքերի հրամանատար գեներալ Պանկրատևը 1830 թ. մայիսի 29-ին տեղեկացնում էր Պասկևիչին, որ Կոստանդնուպոլսում թուրքերը բողոքել են ռուսական դեսպան Օռլովին, թե իբր էրզրումի ռուսական զորքերը ճնշում են գործադրում հայերի վրա, խախտում պայմանագիրը և բռնությամբ գաղթեցնում<sup>22</sup>: Պանկրատևը հաղորդում էր նաև, որ ինքը ստացել է Անատոլիայի սերասկյար Օսման փաշայի և էրզրումի Հաճի-Հասան փաշայի նամակները, ուր ասվում էր. «Թուրքական կառավարությունը, տեղեկանալով էրզրումի հայոց Կարապետ արքեպիսկոպոսի հակաօրինական արարքների մասին, որը իբր հայերին հարկադրում է գաղթել Ռուսական սահմանները, նրա տեղը ուղարկում է ինչ-որ վարդապետի, որը հանձնարարություն ունի համոզել հայերին մնալու թուրքական մարզերում»<sup>23</sup>:

Պանկրատևն, իհարկե, հակահարված է տալիս կեղծիքին, մատնացույց անելով, որ թուրքերն իրենք են բռնություն գործադրում հայերի նկատմամբ, մտացածին լուրեր տարածում ռուսների մասին, որպեսզի մխիթարեն իրենց: Նա ուշադրություն հրավիրեց Մուշի փաշայի 500 հոգուց բաղկացած ավազակախմբի վրա, որը խանգարում էր Խնուսի հայերի գաղթին<sup>24</sup>: Նա իր մոտ հրավիրեց Կարինի նոր առաջնորդ Բարդուղիմեոս եպիսկոպոսին, որպեսզի անձամբ շփվի էրզրումից գաղթող 1000 ընտանիքից կազմված խմբի հետ ու տեսնի՝ հնարավո՞ր էր գաղթելուց ետ պահել որևէ մի ընտանիք. և ամենուրեք ստանում էր նույն պատասխանը. «Եթե անգամ Քրիստոսն ինքն իջնի երկնքից, որպեսզի ներշնչի մեզ մնալ թուրքական տիրույթներում, մենք նրա խորհրդին էլ չենք հետևելու»<sup>25</sup>:

Բացի զանգվածային այդպիսի մեծ գաղթերին յուրահատուկ անխուսափելի դժվարություններից ու տառապանքներից, թուրք կառավարողներն սկսեցին գաղթողների դեմ հարուցել նաև զանազան արհեստական արգելքներ: Զգալով, որ անզոր են սովորական կեղծ խոստումներով, հորդորներով, հատ ու կենտ հայերի կաշառելով, որոշ գավառներում թուրք-քուրդ ավազակների միջոցով գաղթողների վրա հարձակումներ կազմակերպելով խափանել գաղթը, գավառներն ուղարկած իրենց գործակալների օգնությամբ արգելեցին թուրքերին գնել գաղթողների անշարժ գույքը և կալվածքները: Սակայն հայերի գաղթելու ցանկությունն այնքան մեծ էր ու վճռական, որ թուրքերի ձեռնարկած այս ծայրահեղ միջոցը ևս չկարողացավ ազդել նրանց վրա:

Էրզրումի գաղթականների առաջին խումբը, կտրելով մոտ 1000 կմ ճանապարհ և հաղթահարելով բազում դժվարություններ, 1830 թ. հուլիսի 1-ին հասավ Ախալցխա. «Մեք ազգովին, — գրում են նրանք, — բահանայիւք և ժողովրդովք ելաք ի Կարնոյ ի մայիս ամսոյ ըսկսեալ ի Ղարս և ի Գիւմրի օր անցուցանելով յուլիսի ա առաք յԱխալցխայ գիւղական բազմութեամբ»<sup>26</sup>:

22 ՎԿՊՊԱ, ֆ. 2, ց. 1, գ. 2594, թ. 247:

23 Նույն տեղում:

24 Նույն տեղում:

25 ԱԿԱԿ, տ. VII, № 826.

26 ՎԿՊՊԱ, ֆ. 2, ց. 1, գ. 2594, թ. 278:

էրզրումի գաղթականների վերջին խմբերը, 2—3 ամիս տառապելով Գյումրիում, Ախալցխա հասան օգոստոս-սեպտեմբեր ամիսներին<sup>27</sup>: Ազդորում բռնակված էրզրումի գաղթականները Կարսում և Արփաշայի ափին կրած իրենց նեղությունների մասին գրում են. «Կամիմք ծանուցանել տէրութեան ձերում, որ Արզրումայ ելած ժամանակներուս յոյժ նեղութիւն կրեցինք, թէ Ղարս և թէ Արփաշային մնալով զամենայն ինչսն մեր վատնեցինք, մնացինք խեղճ ողորմելի, այնչափ մնացինք, որ արևակէզ լինելով և ունեցած թէ փող և հագուստ բոլորովին ոչնչացան, վերջը եկանք Ախալցխայ բնակութիւն շունենալով մնացինք դուրսը, հիվանդութիւն պատահեցաւ մեռեալն մեռաւ...»<sup>28</sup>:

Ջնայած թուրք կառավարողների հարուցած բազմաթիվ արհեստական արգելքներին ու խոչընդոտներին, 1829—1830 թթ. էրզրումի, Կարսի, Բայազետի փաշայություններից և Թուրքիայի մյուս գավառներից Հայկական մարզ, Շորագյալի, Փամբակի, Մալկայի դիստանցիաներ և Ախալցխայի վաշայություն գաղթեցին 14044 ընտանիք կամ ավելի քան 100 հազար հոգի<sup>29</sup>:

Միայն էրզրում քաղաքից և նահանգի գյուղերից գաղթել են 7298 ընտանիք, որոնց մեծ մասը (5000 ընտանիք) բնակվել է Ախալցխա, Ախալքալաք քաղաքներում և շրջակա գյուղերում, 1050 ընտանիք հայեր և հույներ բնակվել են Մալկայում և նրա շրջակայքում, իսկ 1248 ընտանիք՝ Փամբակի և Շորագյալի գավառներում<sup>30</sup>: Այս նույն գավառներում բնակվեցին նաև Կարսից և նրա գյուղերից գաղթած 2264 ընտանիք<sup>31</sup>: Բայազետ քաղաքից և նրա գավառից գաղթած 4215 ընտանիք հայեր բնակություն հաստատեցին Իյոկչայի, Ապարանի, Դարաշիշակի և Սուրմալուի գավառներում: Կարսի գաղթականներից 200 ընտանիք բնակվեցին Թալինում<sup>32</sup>:

Չնայած մինչև արևմտահայերի գաղթը 8 ամիս ժամանակ կար տներ կառուցելու համար, բայց տեղական իշխանություններ կայացուցիչները ոչինչ

27 Նույն տեղում, թ. 310:

28 ՆՍՍՀ ԳԱ պատմության ինստիտուտի արխիվ, Լեոյի անձնական ֆոնդ, ֆ. 1, ց. 1, վավ. 27, թ. 2:

29 Արևմտահայ գաղթականների թվի վերաբերյալ կան տարբեր տվյալներ, որոնք տատանվում են 85-ից մինչև 100 հազարի միջև: Գաղթականական կոմիտեի 1830 թ. հոկտեմբերի 10-ի տվյալներով գաղթականների թիվը կազմել է 85081 հոգի (ՎԿՊՊԱ, ֆ. 2, ց. 1, գ. 2594, թթ. 313—315): Սակայն կոմիտեն իր հաշվետվության ծանոթության մեջ նշել է, որ իր տվյալները լրիվ և վերջնական չեն կարող լինել, քանի որ Կարսի գաղթականների մի մասը մնացել է տեղում բերք հավաքելու, իսկ գաղթականների ավագների հաշվետվությունները լրիվ չեն: Բացի դրանից, կոմիտեն արևմտահայ գաղթականների ընտանիքների միջին թիվը հաշվել է 6 հոգի, երբ այն կազմել է 7—8 հոգի: Բազմաթիվ հայ հեղինակներ (Ալ. Նրիցյան, Ա. Դո, Հ. Քոսյան, Ղազար Չարրզ, Վահ Հայկ և ուրիշներ) անդրադարձել են արևմտահայ գերդաստանների բազմանդամ լինելու հարցին, իսկ օտարերկրյա ճանապարհորդները (Ա. Հաքստհաուզենը, Մորից Վագները և ուրիշներ) շարմացել են, որ մի հարկի տակ ապրում են երեք սերնդի 20—50 հոգուց բաղկացած ընտանիքներ: Արևմտահայ գաղթականների ընտանիքների անդամների միջին թիվը մեր հաշվումներով կազմել է 7—8 հոգի: Հետևաբար առանց վարանելու կարող ենք պնդել, որ 1829—1830 թթ. գաղթել են 100 հազարից ավելի հայեր: Այդ տեսակետն է պաշտպանել նաև Ալ. Նրիցյանը (տե՛ս Ամենայն հայոց կաթողիկոսությունը և Կովկասի հայք XIX դարում, Թիֆլիս, 1894, էջ 442):

30 ՎԿՊՊԱ, ֆ. 2, ց. 1, գ. 2594, թթ. 313—315:

31 Նույն տեղում:

32 Նույն տեղում:

չէին նախապատրաստել: Առանձնապես ծանր վիճակ էր ստեղծվել էրզրումից Ախալցխա քաղաք գաղթած հայերի համար:

Քանի որ հին քաղաքը՝ Ռաբատը, ավերված էր և հնարավոր չէր միանգամից մոտ 2500 ընտանիք տեղավորել այնտեղ, Գաղթականական կոմիտեն որոշում է էրզրումից գաղթած արհեստավորների և առևտրականների համար Փոցխով գետի աջ ափին հիմնադրել քաղաք, որ և տեղի ունեցավ 1830 թ. օգոստոսի 15-ին: 1831 թ. ավերված Ախալքալաքի տեղում Ախալցխայից տեղափոխված շորս ընտանիքներ կառուցում են տներ, բացում սրճարան, հացի փուռ. շուտով քաղաքը դառնում է բազմամարդ: Բայազետ քաղաքից գաղթած հայերը պատմական Գավառ (Քյավառ՝ ինչպես արտասանում էին իրենք գաղթականները) ավանի տեղում հիմնադրեցին քաղաք, որ հետո վերանվանեցին նոր Բայազետ<sup>33</sup>: 1838 թ. հոկտեմբերի 4-ին կարսից գաղթած հայերի և Գյումրի ժամանած նիկոլայ I-ի ներկայությամբ հիմնադրվեց նոր քաղաք ու բերդ, որը կայսրի հրամանով կոչվեց Ալեքսանդրապոլ<sup>34</sup>:

Միանգամից 100 հազար գաղթականների տեղափոխվելը Անդրկովկաս ծանր վիճակ ստեղծեց թե՛ իրենց՝ գաղթականների, և թե՛ կառավարության համար: Գաղթականները տեղ հասան այն ժամանակ, երբ զարնանացանը վերջացել էր և չկարողացան ցանք կատարել: Գաղթականական կոմիտեն պարտավոր էր մինչև մյուս տարվա բերքահավաքը, մոտ 12—14 ամիս, նրանց ապահովել պարենամթերքով և սերմնացուով: Հաշվի առնելով այդ ծախսերը, Պասկևիչը 1831 թ. մարտի 26-ին նիկոլայ I-ից խնդրում է ևս 380 հազար ռուբլի (արծաթով), քանի որ գաղթականներին անվերադարձ բաց թողած 90 հազար ոսկին սպառվել էր<sup>35</sup>: «Գաղթականները աշխատասեր և արդյունաբերող են,— պատճառաբանում էր նա,— այս ժողովուրդը, որից ափսոսանքով պրկվեց Թուրքիան, պահանջում է հենց սկզբում աջակցություն և ապահովություն, գոնե ամենակարևոր բաների: Հետո, անկասկած, նրանք ամեն ինչ հավելյալով կհատուցեն: Իրենք գաղթականները խնդրում են այժմ միայն նպաստ տալ իրենց, խոստանալով վերադարձնել այդ գումարը գանձարանին, ավելի շուտ, քան թե ցանկանում էր կառավարությունը: Թողնել սուանց ուշադրության գաղթականների կարիքները, իմ կարծիքով, անկարելի է, քանի որ սկզբում ցույց տված հոգատարությունը և ծախսերը չեն հասնի իրենց նպատակին»<sup>36</sup>:

Շնորհիվ այս և նախընթաց դրամական նպաստներին ու այն հոգատարությանը, որը ցույց տվեց Գաղթականական կոմիտեն, արևմտահայ գաղթականները համեմատաբար քիչ ենթարկվեցին այն աղետներին և տառապանքներին, որոնք երկու տարի առաջ բաժին ընկան պարսկահայերին:

Արևմտահայերի վերաբնակեցմամբ կենդանացան Հայկական մարզի այն գավառները, որոնք լրիվ հայաթափ էին եղել կամ մասամբ դարձել մահմեդաբնակ: Օրինակ, Սևանա լճի ամբողջ շրջակայքում հայաբնակ էին միայն

33 ՀՍՍՀ ԳԱ «Տեղեկագիր» (հաս. դիս.), 1953, № 5, էջ 51:

34 Տե՛ս Թ. Չ ա ք ա ր յ ա ն ց, նիկոլայոս կայսրը կովկասում, «Արձագանք», 1884, № 34, 35:

35 АКАК, т. VII, № 829.

36 նույն տեղում:



Ըրանոս, Ապարանի մահալում՝ Մուղնի, իսկ Դարաշիշակ մահալում՝ Արզաքյանգ, Մաղկունք, Բջնի, Յայջի և Գոմաձոր գյուղերը<sup>37</sup>։

Գաղթականների մոտ մեկ երրորդը (4800 ընտանիք) կազմում էին Արևմրտյան Հայաստանի նշանավոր առևտրա-արհեստագործական կենտրոնների՝ էրզրում, Բայազետ, Կարս և այլ քաղաքների բնակիչները, որոնք մեծ դեր կատարեցին ամբողջ Անդրկովկասի առևտրի և արհեստների զարգացման գործում։ Նրանց շնորհիվ հիմնադրվեցին Ախալցխա քաղաքի աշափնյա մասը, Ախալքալաք, Ալեքսանդրապոլ և Նոր Բայազետ քաղաքները։

Արևմտահայերի զանգվածային գաղթի հետևանքով հիմնովին փոխվեց Արևելյան Հայաստանի և Անդրկովկասի որոշ գավառների ազգային կազմը։ Բավական է նշել միայն հետևյալ ուղադրավ փաստը. Ռուսաստանին միացնելու նախօրեին Արևելյան Հայաստանի 169.155 բնակիչից 111.850-ը կամ 66,2%-ը կազմում էին մահմեդականները, 57.305-ը կամ 33,8%-ը՝ հայերը, իսկ միացնելուց հետո հայերը կազմեցին 58,8%-ը կամ 141.682 մարդ, մահմեդականները՝ 42,2 %-ը կամ 99.460 մարդ<sup>38</sup>։ Չնայած ցարական Ռուսաստանի հպատակներ դառնալով արևմտահայերը չէին ազատագրվում սոցիալական ու ազգային ճնշումից, բայց ձեռք էին բերում անձի, գույքի արկածավունություն, որից իսպառ զուրկ էին եղել Թուրքիայում և կապվում էին տնտեսապես ավելի զարգացած, մշակույթով ավելի բարձր երկրի հետ։

Հայ ժողովրդի դարավոր պատմությունն մեջ, որը լի է եղել հայրենիքից դուրս բազմաթիվ բռնագաղթերով, արևմտահայերի գաղթը ամենախոշոր զանգվածային տեղաշարժն էր, որը կատարվեց առանց հարկադրանքի, առանց օտար նվաճողների մտրակների սպառնալիքի, բարեկամական երկրի՝ Ռուսաստանի զորքերի անշահախնդիր ու հուսալի պաշտպանության ներքո։

#### ПЕРЕСЕЛЕНИЕ ЗАПАДНЫХ АРМЯН В АРМЯНСКУЮ ОБЛАСТЬ И СОПРЕДЕЛЬНЫЕ РАЙОНЫ В 1829—1830 гг.

М. Г. ДАРБИНЯН

(Резюме)

Адрианопольским мирным трактатом завершилась русско-турецкая война 1828—1829 гг. По этому договору к России были присоединены кавказское побережье Черного моря от Кубани до Поти, а также Ахалцих и Ахалкалак.

Война завершилась победой России, но мирный договор не оправдал вековые чаяния западных армян—получить освобождение с помощью России. Занятые в Западной Армении территории Эрзерумского, Баязетского и Карского пашалыков вновь были возвращены Турции. Адрианопольский договор создал тяжелое положение для армян этих провинций, которые во время войны всеми возможными средствами помогали русским, с оружием в руках сражались против общего врага.

37 Տե՛ս խ. 2. Ավդալրեղյան, Հուղային հարցը Արևելյան Հայաստանում, Երևան, 1959, էջ 15։

38 Նույն տեղում, էջ 18—19։

По тринадцатой статье Адрианопольского договора, подданным обеих держав предоставлялось право в течение 18 месяцев распоряжаться недвижимым имуществом и переселяться в Россию. В 1829—1830 гг. более 100 тысяч западных армян (14044 семейства), опасаясь мести турок, переселились и разместились в Армянской области и в ее сопредельных районах.

Репатриация армян имела большое значение для развития сельского хозяйства, ремесла, торговли, культуры и консолидации армян в Восточной Армении.